

Hebreos **Minpazha Judío Awaruza Pinkih** **Para**

Pinkih pammikane Judío awaruza an pinkih pam kit usparuza Jesucristowa kamtanantu, mamaz awaruz usparuza naizninnamtu akwa. Minpazha Judío awaruzne Jesucristora chihkashimtu, ussa an nijkulamanpa, an ñancha kamarit aizpa kianapa. Pammikane usparuza kurunnamtu, Judío awa kamarit aizpa kaiyamanpa, Jesucristo kamtamkin anza wat akwa, Dios Jesústa au sukin intit akwa (1.1-3).

Suasne pinkih pammikane Jesús Dios painkul i kamtanamitzu, us Dioskasa ñamin uztit akwa. An sukin naiztuasmin, Jesúsne Dios ussa intit aizpa kamtit. Jesúsne an ñamin Dios pit kainammtuzkinkas (1.1) ángelkinkas (1.4-2.18) Moiséskinkas Josuékinkas (3.1-4.13) ñamin Judío pariyaruzkinkas (4.14-7.28) an katsa milka namtit. Jesucristo akwa, Diosne awaruza masas pit kin nanamtu (8.1-9.28). Jesucristo au akwa irit akwa, usne torokinkas pírikukinkas an tinta i, Jesús au katsa pariya namtit akwa. Diosne Jesucristora nijkultumikara watsat miñnazi, paña kwail kirit aizpa wat kulninnapa, inna ishkumanpa. Ñamin Judío awa tororakas pírikurakas Dios akwa piantaritkas, Jesúsne au kwail akwa irit, ussa nijkultumikara watcha watsat miñnanapa (10.1-31).

Jesucristora nijkulamtruza awaruza watsat miñnanazi kainammtuasmin, pammikane ñamin

akkwan Judío awaruzkas Jesústa nijkulara kaiznara. Capítulo 13kin pammikane Judío awaruza kurunnam kit chiwazha uspa akwa paikwat kit izmuruza kakishapu kiznamtu.

Diosne paiña painkul akwa awaruza paranara

¹ Nane maza pit kainanashimtu, Diosta piankanapa. An ñamin Diosne paiña kainammtuza kurunnara, paiña pit pananapa, an ñamin kwalantuza parananapa. Akkwan pijikas akkwan tuntukas usparuza paranara.

² An minpa payura Diosne paiña painkulta ininta, aumiza parananapa. Diosne ussa narit, wan chiwal sarit aizpa sapnapa, wan ininnapa. Dioskas paiña painkul akwa wan sukas wan chiyukas sara, wan pa kianapa.

³ Diospa painkulne Dioskanain watsal iztit, au awaruz “Dios kwisha wari” piankamanapa. Diosne paiña painkulkanain iztit. Us wan sarit aizpa iznamtu akwa, usne parat kit au sukinkas au chiyurakas us pashit aizpa kinazi, us tinta akwa. Diospa painkul au kwail kiarit aizpa sinam sarawane, usne chiyura nut kit Dios iztakin ininmizta.

Cristone ángelkinkas an tinta i

⁴ Mane Diosne paiña painkulta ángelkinkas an tinta sara. Katmizna Cristowa kalne ángelpa kalkinkas an tinta i. Dioskas ussa paiña painkul munninta, Dios kin namtit aizpa sapnapa.

⁵ Diosne mizurainkas ángelta ka kaiztachi: “Nune ap painkul i.

- Nane nua ap painkulta namnintau”[☆]
 Mamasa ángelta ka kaiztachi:
 “Nane up papihsh anash.
 Nune ap painkul anazi.”[☆]
- ⁶ An Dios painkulne wan ángeltuzkinkas anza tinta i. Dios paíña ñancha painkul au sura uztuza annakane, ka kaiznara:
 “Wan ángeltuzne ussa wanmakkat kit ussa wakpuj wainñarawa.”[☆]
- ⁷ Dios ángeltuzpa parakane, usne sunkana kaiztu:
 “Nane wan ángeltuza ap kiwaintuza namninanash, nawa wakpuj wainñanapa.
 Uspane inkwakanakas ippakanakas izanazi.”[☆]
- ⁸ Paiña painkulne ángeltuzkana chi. Diosne paíña painkulpa ka kaiztu:
 “Nune Dios i. Nune pailta payukima ininnazi.
 Ininkane, nune wan nil aizpa kinazi.
- ⁹ Nune wan wat kinpa pashimtu.
 Nune kwail kinpa pashimtuchi.
 Katmizna nane nua ininnapa nat kit nua up izmuruzkin an wat kulpintau.”[☆]
- ¹⁰ Ma pitchin Diosne paíña painkulta ka kaizta:
 “Nune Anpat i. Nune an ñancha an su sara.
 Nukas up chihtikasa wan chiyura wa aizpa sara.
- ¹¹ Wan sarit aizpa pailtinazi. Nune mizurainkas pailmanazi.
 Wanne pín pittukanain pailtinazi, tailchasachi akwa.
- ¹² Pín Pitta uk kit nan kit masaskana maizmu.
 Nune, Dios painkulne, maizmanazi.

[☆] 1:5 Sal 2.7 [☆] 1:5 2 S 7.14 [☆] 1:6 Dt 32.43 [☆] 1:7 Sal 104.4

[☆] 1:9 Sal 45.6-7

Nune wan payukima uznazi.”[◊]

¹³ Diosne mizurainkas paiña ángeltuza ka kaiznarachi:

“Ap iñintukin nakasa uztain,
ap alitzuza anuppanakima.”[◊]

¹⁴ Dios ángeltuza sunkana kaiznarachikas, Diosne ángeltuza iñinnara, ussa kiwainñapa, ussa wakpuj wainñanapa. Usne usparuza iñinnamtu, Diosta pi-antuza kiwainanapa, suntuz an kwail kiamanpa, chiyura uzanapa. Sunkana Diosne Diosta pi-antuza watsat miñnanazi.

2

Pinkih pammika ka kaiznara: Kwiraruin Dios u akwa kirit aizpa mainmanpa

¹ Dios paiña painkul akwa aumiza paranarit akwa, aune awa aumiza kamtanarit aizpa an akkwan mímiztawamakpas, Dios watsal pit mainmanpa, paiña watcha pit chihkamanpa.

² Ñamin ángeltuzne Moisésta Dios pit kainaara, awa wat aizpakash kwail aizpakash piankamanapa. Diosne sun pit kiarachiruzakas miashitchiruzakas ilninnara.

³ Sunkanain Diosne aumiza ilnanazi, Dios au akwa kinashimtu aizpa kwayarane. Aune Dios aumiza watsat miñashimtu pianmakpas, aumiza ilnamanpa. Au Anpat Jesúsn̄e an ñancha mazantuza Dios usparuza watsat miñnamtu kainanara. Kwiztane us kaizta aizpa mímituruzne níjkulat kit aumiza sun watcha pitmin kainanara.

⁴ Diosne au awaruza sun watcha pit piankamninnara. Sun pit Dios pit i pianmakpas.

[◊] **1:12** Sal 102.25-27 [◊] **1:13** Sal 110.1

Diosne usparuza tinta kiwainnara, awa iztakin akkwan tuntu iztasparit kal kianapa. Dioskas paña Sinam Izpulta au nijkulturuza ininnara, aumiza kiwainnanapa, Dios pashimtu aizpa kianapa.

Jesucristone awakanain namtit

⁵ Mane nane mamazpa su kainanamtus. Dios sun masas su sakane, Diosne mizurainkas ángeltuza masas sura ininnanapa chihkamanazi.

⁶ Mínpazha Dios pitta mínmika an masas sura ininnazi parit. Ka parit:

“¡Ap Dios mizha! ¿Chikishma awaruzpa wat mintu?
¿Chikishma awaruza kiwainashimtu? Uspane awain mai.

⁷ An ñamin une ángeltuza kwisha wat sara.

Kwiztane nune mazara an tinta namninta, wan nu sarit aizpa ininnapa. Sunkana Diosne awaruzpa wat minta.

⁸ Nune mazara an tinta namninta, wan pura aizpa ininnapa.”[◊]

Dios ussa wan pura aizpa chihkakane, usne ussa wan chiwal ininnapa chihkara. Dios awara wan chihkaritkas, makima awane wan pura aizpa ininsachi.

⁹ Mane Jesústa mintain. Diosne ángeltuzkinkas Jesústa akkwan payuchinkimain we tinta namninta. Kwiztane Diosne Jesústa an tinta namnin kit us akwa an wat minta, au akwa naiz kit irit akwa. Dios wan awaruza panashit kit kiwainashimtu akwa, usne Jesústa au kwail akwa inapa intinta. Sun akwa Diosne Jesústa an tinta namnin kit

[◊] 2:8 Sal 8.4-6

watsal mikwa namninta, wan awa us akwa wat minñanapa.

10 Chiwazha Dios kit aizpa wat azi. Us wan pura aizpa sarit akwa, usne wan ininshina. Diosne akwan awaruza paiña pashpa namninnashira, us uzmukin uskasa uzanapa. Katmizna Diosne paiña painkulta, Jesústa, awa kwail kiarit akwa inapa ininta, awaruza watsat milnanapa. Cristo au akwa kapal naiztawane, Diosne ussa au katsa mikwa namninta, aumiza chiyura milnanapa.

11 Jesúsne kwail kirittuza sinam saninnamtu. Uspa paasne maza papihshmin mij. Jesús awaruza uspa kwail sinam sarawane, usne paiña kwal namninnashina. Katmizna Jesúsne, Dios painkulne, wan wat kultittuza ap izmuruz mai kiznashinai, mitsal kitchin.

12 Jesúsne paiña Taitta Diosta Dios pinkihta parit aizpa ka kaiztu:

“Nane ap kanpamtua Diospa paranananash.

Nane awa wanmakmukin ‘Dios watcha i’ kanta kiznash”[⊗]

13 Mamasa Jesús ka kaizta:

“Nane Diosta nijkulnash.”[⊗]

Mamasa ka kaiztu:

“Nane apain tus, Diosta piantuzkasa. Diosne suntuza nawa chihkanara, usparuza iznanapa.”[⊗]

14 Jesúsne au awakanain namta. Us irawane, Jesúsne Diablora anuppara, awaruza tinta ininnamanpa, awaruza akwan kwail kininnamanpa.

[⊗] **2:12** Sal 22.22 [⊗] **2:13** Is 8.17 [⊗] **2:13** Is 8.18

15 Sunkana Jesúsne Diablora ishkumturuza chihtnara. An ñamin an sura uzamtuasmin, uspane pailta payukima irin ishkuarit, iashitchi akwa. Uspane kiwainmuruzkana Diablo ininta aizpa kiara.

16 Watcha, Jesúsne an sura ángel akwa kiwainna atchi. Us apain akane, usne Abrahampa kwaltuz akwa kiwainna ara, usparuza watsat miñnana.

17 Katmizna Jesúsne Diosta piantuzkanain nam kit naizta, usparuza kiwainanapa, usparuza wat kinanapa. Au akwa naiztawane, Jesúsne katsa pariya, watchamika namta, Dios iztakin au akwa paikwan. Suane usne Diosta piantuza, paiña kwaltuza, uspa kwail kiarit aizpa wat kulnashina.

18 Diablone Jesústa kwail kinpa kininshira, naiznnapa. Jesús wan tailchat akwa, mane usne kwail kishimturuza kiwainnashina, kwail kiamanpa.

3

Jesúsne Moiséskinkas an katsa i

1 Katmizna, Diosta piantuz mizhain. Diosne uruza paiña kwal namna akwanara, chiyura uzanapa. Jesúspa níjkultain. Dios ussa ininta paiña kal kinpa pianmakpas. Aune Jesús au katsa pariya i pianmakpas.

2 Dios Jesústa paiña kal chihkatpane, Jesúsne kwairachin kapal kira. Moiséskas Diospa kwal uzkin wan kal kapal kirit.

3 Sun Jesúsne Moiséskin an tinta mika i, Jesús wan pura aizpa sarit akwa. Jesúsne, awaruza paiña kwal namnintumikane, paiña kwalkin an tinta i.

4 Minpazha wan yalkin uztu aizpa sarakas, Diosne wan chiwal wa aizpa sara.

5 Moisés Diospa yalkin kiwainnumikakana kal kimtuasmin, usne Dios kaizta aizpa chinkas main-tachin mira. Dios Moisésta parawane, usne sun pitmin Diospa kwaltuza kainanara, Dios kishimtu aizpa piankamanapa.

6 Cristone Moiséskana chi azi, Cristo Dios painkul ara akwa. Diospa painkulne paiña kwaltuza wat ininnat kit Dios ussa ininta aizpa mira, main-tachin. Diosne aumiza paiña kwal namninnara, uskasa nukkulanapa. Katmizna aune Cristora tñriztawamakpas, us aumiza watsal kulnashimtu akwa. Sun payura aune Dios aumiza milashimtu aizpa milananzia pianmakpas.

Diosne ussa piantuza kwaizkulninnanazi

7 Katmizna une Sinam Izpul Dios pinkihta panintit aizpa wat miarawa. Sunkana parit:

“Ma payu Dios uruza kwinta kinakane, une us kuruntu aizpa miarawa.

8 Sun pit uruza kainammtu aizpa kwainachi. Ñamin Israel awaruz pul suwara chaamtuasmin, uspane cuarenta añokima kwail kiat kit Dios kaizta aizpa miashitchi.

Uspane Dioskasa aliz kularit.

9 Sun pul suwara pinamtuasmin, u ñamin kwalne nawa aliz kulara, na kuruntit aizpa pianka-mashitchi akwa.

Na uspa iztakin akkwan watsal kal kitkas, us-pane cuarenta añokima nawa wat miarachi.

10 Katmizna nane sun payu uzattuza aliz kulnat kit usparuzpa

ka kaiznaraau: ‘Uspane pailta payukima uspa kaijchukin nawa kwail minñat kit ñan miwara iashimtu.

Uspane na usparuza kamtanantu aizpa miashitchi.’

11 Katmizna nane usparuza aliz kul kit kaiznaraau: ‘Une nakasa kwaizkulmukin nappamanazi, tinta namanapa.

Une kin namtit urara, Canaán sura nakasa uzamanazi.’ ”¹³

12 Diosta nijkulturuz, uruzpain iztain, minminkas kwail namamanpa, minminkas Dios mi kaamanpa. Diosta nijkulshimtuchimikane Diosta, chiyura uztumikara, kwainazi, ussa an kanpamanpa.

13 Dios aumiza makima mama akwanamtuasmin, pailta payukima uruzpain wat kishirain, tinta namnakima. U Diosta miashimtukine, ñanta kimmikane uruza kwail kininnashina. Ukas Dios kamtarit aizpa kwainnazi.

14 Dios pit miarawane, aune Cristowa kwal namtitmakpas, uskasa uzana. Makis aune Cristora watmin nijkulmiztawamakpas. Minpa payukima ussa miamiztane, aune Cristo uzkin uzipapas.

15 Dios pitta ka parit:

“Ma payu Dios uruza kwinta kinakane, une us kuruntu aizpa miarawa.

Sun pit uruza kainammtu aizpa kwainachi.

Ñamin Israel awaruz pul suwara chaamtuasmin, uspane cuarenta añokima kwail kiat kit Dios

¹³ **3:11** Sal 95.7-11

kaizta aizpa miashitchi. Uspane Dioskasa aliz kularit.”¹⁵

16 Une sun Dios kaizta aizpa miashitchiruza pian. Moisésne, mikwakana, sun Judío awaruza Egipto suras ukkanara, pul suwara ussa kanpaanapa.

17 Cuarenta añokima pul suwara chaamtuaasmin, uspane kwail kishiat kit Dios kaizta aizpa miashitchi. Uspa kwail kiarit akwa, Diosne usparuza aliz kulnat kit naizninnara, sun awaruz pul sura ianakima.

18 Diosne sun us kaizta aizpa mirachiruza ka tinta kaiznara: “Nawa mirachiruzne mamaz Canaán sura, uspa kwaizkulmukin, nappamanazi.”

19 Sunkana aune uspa kwaizkulmu sura napparachi pianmakpas, uspa Diosta nijkularachi akwa.

4

1 Katmizna Dios paiña kwaltuza uskasa kwaizkulana pa kin namtit akwa, makima Diosne mama aumiza Diospa kwaizkulmukin nappanapa akwanamu. Katmizna aune arakan awakana uztakiwamakpas, sun kwaizkulmukin kamanpa. Suane aune Dioskasa kalpain uzanapas.

2 Diosne an ñamin uztuzakas aumizakas ma uztuzakas kawarin sun watsal pit kainanara. Uspa sun watsal pit miarakas, an ñamin uztuzne Dios watsal pit nijkulashitchi. Sun akwa Diosne usparuza watsat milnarachi.

3 Aune Dios kwaizkulmukin nappanapas, Dios kin namtit aizpa nijkultu akwa. Minpazha us kaizta aizpa nijkularachi akwa, Diosne usparuza

¹⁵ **3:15** Sal 95.7-8

aliz kulnat kit paiña pinkihta usparuzpa ka panintit:

“Uspa nawa aliz kulpintit akwa, nane usparuza ka kaiznara:

‘Uspane nakasa ap kwaizkulmukin nappamanazi.’ ”[☆] ka parit.

Dios wan pura aizpa sarakima, usne me paiña kwaizkulmu sarit, kwaizkulna.

⁴ Dios pinkihta sun séptimo payura Dios kit aizpa ka parit:

“Wan wa aizpa kapal sarawane, Diosne séptimo payura kwaizkulta,
paiña kwaizkulmukin.”[☆]

⁵ Mamasa Diosne sun pinkihta ka panintit:

“Uspane nakasa ap kwaizkulmukin nappamanazi, nakasa kalpain uzana.”[☆]

⁶ An ñamin uzturuz sun watsal pit miarakas, uspane Diospa kwaizkulmukin Dioskasa kalpain uzana nappasachi, Dios kaizta aizpa njikularachi akwa. Katmizna makima mamaz awaruzne Diospa kwaizkulmukin pianashina, Dioskasa kalpain uzana, Dios kaizta aizpa miamtune.

⁷ Dios paiña kwaltuza akkwan piji paiña kwaizkulmukin uskasa kalpain uzana akwanarakas, usne mamasa wan awaruza “ma payu naptain” kaiznamtu. Paiña kwaltuz pul suwara chaamtuasmin, Diosne usparuza akwanara. Kwitztane akkwan año pailtawane, Davidne Dios pinkihta, salmo pinkihta, sunkana parit:

“Dios uruza kwinta kinakane, une us kuruntu aizpa miashina.

[☆] **4:3** Sal 95.11 [☆] **4:4** Gn 2.2 [☆] **4:5** Sal 95.11

Paiña pit uruza paranamtú aizpa kwaiman,”[◇]

⁸ Josué Canaán sura Israel awaruza miñnarakas, Diosne usparuza mamaz sura kwaizkulninnapa kin namnara, uskasa kalpain uzana. Josué Israel awaruza Canaán sura kwaizkulninnaratne, Diosne kwizta mamaz payuwa parasachiatka. Katmizna awane mamaz payura sun kwaizkulmukin nappashina, Dioskasa kalpain uzana.

⁹ Katmizna Dios kaizta aizpa mīraruzne Dios kwaizkulmukin Dioskasa kalpain uzana nappanazi, Dios séptimo payura kwaizkultukana kwaizkulana.

¹⁰ Dios paiña kal kapal sarawane, usne kwaizkulta, wan kin minta aizpa pailta akwa. Sunkanain awa Dios kwaizkulmukin nappararuzne Dioskasa wanmakkat kit ussa nīkulamtu, uskasa kalpain uzana.

¹¹ Katmizna aune an tīnta namtawamakpas, Dioskasa wanmakkninnanapa, ussa nīkulana, uskasa kwaizkulana, uskasa kalpain uzana. An ñamin uzturuzne Dios kaizta aizpa miashitchi. Katmizna uspane Dioskasa wanmakkachi, ussa nīkularachi akwa. Uspa uzarakanain uzman.

¹² Dios paiña pit pīnkihta panintītkas, usne sun pīnkih awaruza paranamtú, sun pit piancam kit kianapa. Sun pitne Dioskanain uz. Mizurainkas kasachi. Sun pitne tīnta i. Sun pitne pamans tiz mashtikana i. Mashti wan ñakas wan impulkas wan sihkas tītshina, awa ayukta wa aizpa izanapa. Paiña pit akwa, us aumiza parakane, au izpulta paramtu. Diosne paiña pit akwa au mintu aizpa

[◇] 4:7 Sal 95.7-8

piankamnintu, chiwazha wat aizpa naanapa, chiwazha kwail aizpa kwayanapa.

¹³ Aune Dios iztakin aumiza kulasachimakpas, Dios wan awaruzakas wan sarit aizpakas iznashimtu akwa. Minminkas us mintu aizpa kulasachi. Diosne au chamtukin pian. Katmizna aune Diosta au kit aizpakas au minñarit aizpakas sinkarawamakpas.

Jesúsne katsa pariya i

¹⁴ Jesúsnne, Dios painkulne, au an katsa pariya nam kit Dios uztukin napta. Katmizna aune an tinta namtawamakpas, au Jesucristora an níjkulmiznapa.

¹⁵ Au katsa pariyanne au naiztu aizpa pian. An su uztuasmin, usne najtit uz kit us wan awa naizaritkanain naizta. Katmizna usne au akwa min kit kiwainnashimtu. Mazantuz ussa kwail kininarakas, usne mizurainkas kwail kitchi.

¹⁶ Katmizna Diosta paikwatpamakpas, ishkwatchin, us aumiza pashinamtu akwa. Usne au kwail kirit aizpa sinam samtu. Ussa paikwatne, usne au wainñamtu aizpa piankam kit aumiza wat minñat kit aumiza kiwainanazi.

5

¹ Mane Diosne maza pariyyara Judío awaruztas namtu, ussa katsa pariya namninnapa. Suasne sun katsa pariyanne awa akwa Diosta kwinta kimtu, Dios awaruza kiwainanapa. Sun pariyyaruzne awaruzpa milam Diosta milaamtu. Uspakas awaruzpa piantamtu aizpa Diosta milaamtu, awa kwail kiarit aizpa wat kulnanapa, sinam sananapa.

² Apas Judío pariya wan awa kwail kimitukanain kwail kimtu akwa, uspane mamaztuza watmin kiwainashina. Usne wan kwail kimituzakas kiwainashimtu, uskas kwail kimtu akwa.

³ Judío pariya awakanain kwail kimtu akwa, usne an ñancha chiwazha piantarawa, Diosta milan, Dios paña kwail kirít aizpa sinam sanapa. Sun kitpane, pariyane awa piantarit aizpa Diosta milashina, Dios an awa kwail kiarít aizpa sinam sanapa.

⁴ Sun Judío pariyane usmin nasachi, katsa pariya namna. Diosmin ussa akwat kit katsa pariya Aarón namtakana namnintu. An ñamin Diosne Aarónta nara, katsa pariya namna.

⁵ Cristokas usmin katsa pariyara namna narachi. Dios ussa narawane, usne ussa katsa pariyara namninta. Suasne Diosne, paña papihshne, sunkana kaizta:

“Nane nua ap painkulta namnintau.

Nakas up papihsh namtirau.”⁵

⁶ Dioskas mamaz pinkihta ka panintit:

“Nune minpa payukima katsa pariyakana uznazi.

Nune pariya Melquisedec kal kirítkana kinazi.”⁶

⁷ Cristo an sukin uzasmin, usne Diosta tinta paikwara, ussa kiwainnupa. Diosta paikumtuasmin, usne tinta akwat kit azta, ishitchi akwa. Cristo paña papihshta wakpuj wainta akwa, Dios kishit aizpa kit akwa, Diosne us paikwat aizpa mit kit ussa irittas kakulninta.

⁸ Us Dios painkul atkas, usne Dios ininta aizpa tinta tailchat kit us kaizta aizpa mit kit piancamta.

⁵ 5:5 Sal 2.7 ⁶ 5:6 Sal 110.4

⁹ An sukin uzasmin, Cristone Dios kaizta aizpa mit kit Dios ñinta aizpa kapal kira. Sun akwa, usne au katsa mikwa namta, ussa mimtuza chiyura nuninnanapa, pailta payukima usparuza watsat milnanapa.

¹⁰ Sun akwa, Diosne Cristora katsa pariya namminta, pariya Melquisedec kal kitkanain kinpa.

Cristora nijkultuchine, kwail i

¹¹ Nane uruza akkwan pit paranashimtus, u Melquisedec katsa pariyawa piankamanapa. Suasne une Cristowa, au katsa pariyawa, piankamanazi. U Dios pit miashimtuchi akwa, nane uruza wat kamtnasachish. Une piankamasachi.

¹² U akkwan añokima Jesucristowa miaritkas, une kamtamtuñamarachi. Dios pit we piankamarit akwa, une an katsa kawiarachi. Une sun an ñancha pit kamtarit aizpa kiarawa. Une sun pit uruza kamtarit aizpa miarawa, Cristo uruza watsat milnamtu akwa. Cristora an nijkularawa, Dios pit an wat piankamanapa.

¹³ Dios pit we piantuzne chiwazha kwail aizpakas wat aizpakas naasachi. Une Dios watcha pit kamtasachi, wat pianchi akwa.

¹⁴ Cristora an wat piantuzne an tinta namat kit Diospa an piankamamtu. Diospa an piankamaturuzne wat aizpa naamtu. Uspane chiwazha kwail aizpa naamtuchi.

6

¹ Sun akwa an ñancha Cristowa kamtarit aizpa piankamarawane, aune an tinta namat kit Cristowa kamtarit aizpa an kammiznachain.

Nane uruza an ñancha kamtanarit aizpa mamasa kamtanashitchish. Sun payuin nane uruza u kwail minñarit aizpa chihkanapa kamtanaraus, Dios kwail kimtuza ilnamtu akwa. Sun payukas nane uruza Diosta níjkulana kamtanaraus, Cristo uruza kwaitas watsat miñnanapa.

² Nane uruza an kamtanamanash, awaruza kwazikasa munnanapa. Nane Cristora níjkulturuza kízpukin chihtikasa pana uruza an kamtanamanash, Sínam Izpul sappanapa. Nane irittuz piltas kuhsanazi uruza an kamtanamanash. Nane Dios Cristora pianchiruza pailta payurakima naizninnanazi kamtanamanash. Ñamin nane uruza sunpa kamtanaraus.

³ Dios aumiza kiwainashimtu akwa, aune an tinta nampuspas. Chiwazha aumiza an ñamin kamtanarit aizpa piankamarawane, aune katsa pariya Cristowa an kamanawas.

⁴ Minpazha awa Cristowa piankamarakas, awa Cristora níjkultawane, Cristora we mímтурузне wan kamarit aizpa kaarishina, Cristowa kamtit aizpa kwairane. Dios kamtamtu aizpa kwairittuzne mamasa Cristora kaiyasachi, uspa minñamtu aizpa maizasachi akwa. Chiyuras Dios sun awaruza wat kiwainarakas, ussa kwairane, uspane Diosta kaiyasachi. Diospa Sínam Izpul usparuza chiwazha Diosta milanamtukas, Diosta kwairane, uspane Diosta kaiyasachi, usparuza maizanapa.

⁵ Sun Dios pit miraruzne Dios paiña kwaltuza wat kin namtit aizpa piankamamtu. Cristo kailnakima uspane Dios kwaltuza tinta kiwainamtu

piankamara.

⁶ Sun Diospa pianturuz an miashimtukine, Cristora an nijkulashimtukine, uspane Cristora kwait kit wan kaarinazi. Cristora kwaimturuzne “Jesús Dios painkulchi” kizanazi. Uspane Diosta mamasa kaiyasachi, Cristo uspa kwail kiarit aizpa s̄inam sanapa. Sunkana kizmuruzne Jesústa piantararuzkana mai. Cristowa kwail minñamtu akwa, uspane Cristowa kwail kizanazi, ussa ishanamtu akwa.

⁷ Aluwa kwinta kinash. Alu kikane, alu pilta taiz kit pulishtim. Pilta naptu. Alu pilta naptu akwa, pippa warit aizpa chikkamtu. Kwiztane pippa waramikane Dios milat aizpa sapnazi. Sunkana Diosne paina pit miraruza wat kinashimtu.

⁸ Sun pilta pumin chiktane, sun sune kainsih, palichi. Kainsih akwa awane pu tizpiannazi. Tizpiantawane, awane pu pulchaknin kit īnta impaktanazi. Diosne sunkana us kaizta aizpa mishimtuchiruza naizninnanazi.

Pinkih pammikane ka kaizta: “Ap izmuruza mizain”

⁹ Ap izmurus, mizhain, na uruza pashinamtu akwa. Na uruza sunkana kurunnarakas, nane u Cristora kwayarit kaiznamtuchish. Nane Dios uruza watsat milnamtu pianish, paīna wat kal kianapa.

¹⁰ Dios wat akwa, us kimtu aizpa nil i. Sun akwa Diosne u izmurus kal kiāmtu aizpa mainmanazi. U usparuza pashiamtu akwa, une mama Diosta piantuza wat kiwainashimtu.

¹¹ U Diosta piantuza kiwainamtuasmin, nane uruza paikwashimtus, sunmin kal kiāmiznapa,

Cristo kailnakima. Suasne Diosne u t̄iriztu aizpa uruza milananaazi.

¹² An sukin uzamtuasmin, une arakan awakanain uzman. An ñamin Diosta m̄iararuz uzarasmin, uspane wenamtachin Diosta nijkulamizta, Dios usparuza kin namtit aizpa sappanakima.

¹³ Dios Abraham akwa chiwazha kin namtane, usne us kaizta aizpa kira. Dioskin anza katsa iztamika wachi akwa, Diosne ussa watcha parat kit

¹⁴ mamasa ka kaizta: “Watcha. Nane Dios munt̄itmika ish. Katmizna nane nua kwisha wat kinash. Nane nua akkwan pashapara milnapa kiwainnash,”[¤] ka kizta.

¹⁵ Abraham Diosta t̄irizta akwa, Diosta maintachin nijkulta akwa, Diosne us milam namtit aizpa ussa milara.

¹⁶ Izmuruz mamazta pit parakane, izwainmumikara sayarawa, wat milnapa, watmin chaanpa. Maza awa “Dios ap izwainmumika i” kizkane, mamaz izmumikane “us kaizta aizpa watcha i” kizshina.

¹⁷ Dios “nawa mīmturuza ap kwal namninanash” kizta akwa, usne usparuza paiña uzmukin milana namta. Kwiztane mamasa usne an kishit aizpa kin namta, wan awa piankamanapa. Dios maiztuchi akwa, usne paiña kwaltuza kin namtit aizpa kinazi.

¹⁸ Dios paiña kwaltuza kin namnarakas, kwiztane usne mamasa kishit aizpa t̄inta kin namta, wan awa watcha piankamanapa. Dios pa piji us kishit aizpa kin namtit akwa, aune Dios p̄irail

[¤] **6:14** Gn 22.16-17

apmanazi piammakpas. Katmizna aune au izmumikasha, au Diosta, iřitmakpas, us aumiza kwira kinanapa. Usne aumiza an tinta namninnanazi, Dios aumiza milana namtit aizpa sappanapa.

¹⁹ An sukin uztuasmin, aune Diosta třirtumakpas, us aumiza milan namtit aizpa sapnakima. Aune Cristo watcha i pianmakpas, us au katsa pariayakana Dios watsal uzkin naptit akwa. Jesucristo akwa aune Diosta paikumtumakpas, us milan namtit aizpa třizana.

²⁰ Jesús chiyura an ñancha naptit akwa, usne aumiza sua milana namtu, us au katsa pariya namtit akwa. Sua au akwa pailta payukima Diosta paikumtu akwa, mane usne pariya Melquisedec kal kirikitana kimtu.

7

Jesúsne katsa pariya Melquisedeckana namtit

¹ An Melquisedecne Salem pipulu katsa mikwa munazi. Uskas katsa Diospa pariya munazi. Abraham cinco katsa mikwaruza anupparawane, Melquisedecne ussa wanmal kit us akwa Diosta paikwara, ussa tinta kiwainnapa.

² Katsa mikwaruza anuppanarit akwa, Abrahamne uspa mijat aizpa ukkat kit Melquisedecta akkwan milara. Chiwazha diez mijne, maza ukkat kit Melquisedecta milara. Melquisedecpa munne “ap katsa mikwa wat kimtu” kiztu. Salem pipulura inintit akwa, awane “an katsa mikwa awaruza kalpain uzninnamtu”[✳] kizara.

³ Minminkas Melquisedecpa papihshpkas paña akkuhshpkas pinkihta parachi.

[✳] **7:2** Gn 14.17-20

Minminkas paiña kwal an ñamin uzturuza pianchi. Us kawira payukas us irit payukas minminkas pianchi. Melquisedecne Dios Painkulkana i. Dios painkulne katsa pariya nam kit Dioskasa pailta payukima nukkultu.

⁴ Sun Melquisedec katsa mikwa azi piankam-tain. Melquisedecne Abrahamkin an katsa mikwa azi. Abrahamne an ñancha Israel kwalpa papihsh azi. Katmizna cinco mikwaruza anupparawane, usne Melquisedecta chiwazha kana kirit aizpa milara. Minmika diez mijne, usne maza ukkat kit ussa milara.

⁵ Ñamin Moisés uztasmin, Diosne Israel awaruztas Levíwa kwalta namninnara, pariwaya kal kianapa. Moisésne Israel awaruza ininnara, chiwazha kana kirit aizpa pariyaruza milanana. Minmika diez mijne, usne maza ukkat kit pariyaruza milanarawa. Israel awaruz Abrahampa kwalpakis puzarakas, uspane pariyaruza, uspa kwaltuza, Dios inintit aizpa milanarawa.

⁶ Melquisedec Levíwa kwalchikas, usne Abraham milat aizpa sapta. Kwiztane Melquisedecne Diosta paikwara, Abrahamta, Dios kin namtitmikasha, wat kiwainapa.

⁷ Melquisedecne Diosta paikwara, Abrahamta wat kiwainnapa. Katmizna aune Melquisedec Abrahamkin an tintamika i pianmakpas.

⁸ An sukin uzamtusmin, apas awaruzne pariya irimtuza chiwazha milanamtu. Apas pariya imtukane, mamazne ussa maiz kit paiña kal kinazi. Izwainmuruzne Melquisedec mizurainkas irachi kizamtu.

⁹ Ankas ma pitchin kaiznash. Levíne an sukin

paiña paimpa sapta. Leví an kwizta kawirarakas, Abrahamne Melquisedecta paiña paimpa milara, paña pashpa Levíwa akwa. Sunkana wan Israel pariyaruzne Melquisedecta uspa paimpa milaarit, Abraham akwa. Sun akwa Melquisedec pariyane Leviwa pariyakin an tinta i pianmakpas.

¹⁰ Melquisedec Abrahamta wanmaltawane, Abrahamne mama pashpa mijchi azi. Abraham mama pashpa mijchikas, usne Melquisedecta paña Israel kwal akwa, kwizta uzturuz akwa, paña paimpa milara.

¹¹ Levíwa pariyaruzne Judío awaruza kurunamtu, Moisés parit aizpa mianapa. Uspane an ñancha pariya, Aarón muntitmika, kal kitkana, kiamiczta. Moisés parit aizpa miarakas, sun pitne awaruza an wat namninnarachi, Dios usparuza wat kulninnanapa. Akwan pariya Aarónta kanpaarakas, uspa us kal kitkana kal kiarakas, mamaz tuntu pariya atpa, awaruza wat namninnanapa. Sun masas pariyane pianashina, Melquisedec kal kiriktana kinpa.

¹² Katmizna Diosne mamaz tuntu pariya nara, awa sinam sarittuza sappnanapa. Diosne pariya Aarónta kanparuza kwaiyat kit wanta maizninnara. Pariya Aarónkana kal kirittuza painintawane, Dioskas Moisés Judío awaruza inintit aizpa maizninnara. Dios Moisés inintit aizpa kwairit akwa, awaruzmin mamaz tuntuwara Dios uzkin piannashina.

¹³ Jesúsnne sun masas pariya azi. Us pariya kwalkis puztachi akwa, paña kwaltuzne mizurainkas Diospa yalta kal kiarachi.

¹⁴ Wanne Cristo Judá kwalkis puzta pianmai.

Moisés Israel awaruza pariya Leví kwalpa panaritkas, usne mizurainkas pariyaruz Judá kwalkis puznazi pinkihta parachi.

¹⁵ Aune Dios kishimtu aizpa an wat piankamshimtumakpas. Dios Moisés inintit aizpa maizta akwa, uskas Levíwa pariyarua maiznara. An masas pariyane, Cristone, Melquisedec kal kirikana ara.

¹⁶ Moisés Levíwa kwal pariyarua namnashina kaiztakas, Diosne Moisés kaizta aizpa maiz kit Cristora pariya namninta, pailta payukima uztu akwa.

¹⁷ Sunkana us akwa Dios pinkihta ka parit:
“Nune minpa payurakima pariya tuanazi.

Nune pariya Melquisedec kal kirikana kinazi.”[◊]

¹⁸ Katmizna Diosne Moisés Judío awaruza pinkih pat inintit aizpa kwairit, sun ñamin pit uspa kwail kiarit aizpa sinam sanasachi akwa, awaruza watsat milnasachi akwa.

¹⁹ Moisés pat inintit aizpa awaruza wat namninarachi akwa, Diosne masas watsal pit awaruza intinta, awa Jesústa tñirizanapa, usparuza watsat milnanapa. Us akwa awane Diosta kasha pi-anashina.

²⁰ Levíwa kwaltuzne pariya namara, Moisés sun inintit akwa. Diosne Jesucristora au katsa pariya namninna namta, wan awa sun piankamanapa.

²¹ Levíwa kwaltas pariyaruz kawiamtu akwa, uspane pariyaruz namamtu, pariyawa kal kianapa. Diosne wan awaruza us kaiztit aizpa piankaminnat kit Jesucristora au katsa pariya

[◊] **7:17** Sal 110.4

namninna namta. Paiña píñkíhtakas Cristowa ka parit:

“Nane up Dios ish. Nane nua katsa pariya namnintus, ap kal pailta payukima kinpa.

Na pirail kaiztuchi akwa, nane nua kaiztit aizpa maizmanash.

Nune pailta payukima Melquisedec kal kirítkana kinazi.”²⁵

²² Dios Jesucristora sunkana narit akwa, aune Jesúspa pit Moisés ininta pitkin anza wari pi-ankamtumakpas.

²³ An ñamin pariya uzmuruzne akkwan mazi. Uspane uspa pariya kal kiamízsachi, iarit akwa. Larawane, mamaz pariayaruzne uspa kal kiara.

²⁴ Jesúsne manaz pariayaruzkana chi. Us imtuchi akwa, usne pailta payurakima nukkulnazi. Au katsa pariyané mizurainkas maizmanazi.

²⁵ Katmizna Jesúsne Diosta aashimturuza pailta payukima watsat milnanantu. Mane Jesúsne uspa pariyané, chiyura uz kit Diosta uspa akwa pailtachin paikumtu.

²⁶ Aune maza pariya Jesúskanain pashiamtanash. Usne Dioskana wat i. Usne mizurainkas kwail kin mintachi. Us sinam awa akwa, usne apas kwail kímtuzkana uztachi. Mane usne Diospa chiyura uztu, Dios paíñawa wat mintu akwa.

²⁷ Sun Judíowa katsa pariayaruzne, an ñamin an sukin uzturuzne, payu aizpa piantarit aizpa Diosta milanara, pariayaruzpa kwail kiarit akwa. Kwiztane uspane piantarit aizpa Diosta milanara, awaruzpa kwail kiarit akwa. Jesús wan awa akwa

²⁵ **7:21** Sal 110.4

maza piji irit akwa, usne pailta payukima au kwail kiarit akwa sinam sanashinai.

²⁸ Moisés sun pit Judío awaruza panat kit Leví kwaltuza katsa pariyaruz munnanapa ininnara. Sun pariyaruzne wan awakanain kwail kiara. Moisés an ñamin sun inintit aizpa parakas, kwitztane Diosne parat kit paiña painkulta nat kit Jesústa katsa pariya namninta, au akwa pailta payukima Diosta paikwanpa.

8

Cristone an katsa pariya namta

¹ Na sun pit uruza kainammtu aizpa mīrain. Mamaz pitne an pitkin anza watsal wachi. Jesucristo au katsa pariya namtawane, usne chiyura, Dios uzmukin nura, Dioskasa wantuza ininnanapa. Suane Diosne ussa an tinta namninta.

² Us au katsa pariya namtit akwa, usne Dios uztukin paiña kal mij. Awane Diospa uztukin sarachi.

³ Moisés Judío awaruza uspa pariyarua namninnanapa ininnara, chiwazha piantarit aizpa Diosta milananapa. Uspane mīlamkas Diosta milaara. Sunkana Jesúsn, au katsa pariyane, Dios pashit aizpa kit kit au kwail akwa irit.

⁴ Jesúsn an sukin uzaratne, usne pariya tua manazi, apain akkwan pariya pura akwa. Apas pariyaruzne Diosta chiwazha mīlaamtu, Moisés usparuza ininnarit akwa.

⁵ Au sukit pariyaruz Dios yalkin kal kiamtuas min, Dios uzmukin chiyura anza watsal i. Apas pariyaruz Dios yalkin uspa kal kiamtuas min, uspa

kalne izpulkana iztit, Jesús chiyura, Dios uzmukin, paña kal kimtu akwa. Moisés an sukin Dios yal sarachasmin, Diosne sun yal miza sana ussa kam-tara. Moisés Dioskasa Sinaí īnkalta chamtuasmin, ka kaizta: “Na nua an yal antu aizpa izti, an sukin ap yalta sanapa. Izpulkana iztit. An yalne Dios uzmukana iztuchi.”⁶ ka kizta.

6 Mane, Jesúsne, au katsa pariyane, an sukin pariyaruzkin anza wat kal chiyura sapta, Diosta au akwa paikwan. Au sukin pariyaruzne Moisés ñamin īninta aizpa kiamtu. Uspa kalne an we tinta i. Sun masas contrato akwa, Jesúsne awaruza Dioskasa wanmakanashina, awa Dios uzkin nappanapa. Jesúsne an wat contrato sat kit aumiza kiwaina namta, us parat aizpa piankananapa, au kwail kiarit aizpa kihanana.

7 Awa Moisés an ñamin īnintit aizpa miasachi akwa, Diosne masas contrato chihkat kit Moisés an ñamin īnintit aizpa maizninta. An ñamin contrato awaruza wat namnasachi akwa, Diosne masas contrato aumiza chihkanara, awaruza wat namninnanapa.

8 Diosne Israel awaruza kwail kiarit kaiznara, Moisés īnintit aizpa miashitchi akwa. Sun akwa Diosne paña pīnkihta patnin kit ka kaiznara:
 “Mízhain. Mamaz payura nane masas contrato
 īninnanash,
 an Israel awaruzkas,
 wan Judá awaruzkas, ap masas īninta pit
 nijkulanapa,
 nakasa contrato nappanapa.

⁶ **8:5** Éx 25.40

9 Judío awaruzne an kwizta nakasa masas contrato nappanazi.

Judío awa Egipto suras puzarawane, uspa pihshtzne nakasa njukulat kit an ñancha contrato sappara.

Suasne nane papihshkanain usparuza Egipto suras miñnarau.

An ñancha contrato sapparakas, uspane ap contrato kwayarit.

Ap contrato kwayarit akwa,
nane usparuza mishimat kit kwainarit.

10 Nane mamaz payura masas contrato usparuza chihkananazi,

Israel awaruz masas contrato nappanapa.
Diosne sun masas contratokin ka parit:

Nane na inintit aizpa usparuza piankamninanash.

Nane uspa kaijchukin ap pit njukulninnanash.

Nane uspa Dioskanain tuanash, usparuza kiwainana.

Uspene ap kwalkanain puranazi.

11 Wan awa Diosta piankamantu akwa,
minminkas paña izmuruza Diospa kamtanamanazi.

Minminkas paña kwaltuza Diospa kamtanamanazi.

Awane mamaztuza ‘Diosta piankamtain’ kaizamanazi, wan awa nawa me piankamantu akwa.

Katsa mikwaruzkas katsachiruzkas Diosta piankamanazi.

12 Na awaruza pashinamtu akwa, nane uspa kwail kiarit aizpa wat kulnanash.

Nane uspa kwail kiarit aizpa sinam sananash.

Uspa kwail kiamtu aizpa pailta payurakima mainnanash.”*

13 Dios masas contrato chihkarawawne, usne an ñancha contrato kiakpinta, wat chi akwa. Sun contrato wat chi akwa, tailchamai. Pailnapain azi.

9

Chiyura Dios uzmu yalkas au sukin Dios yalkas

1 Diosne an ñancha contrato Israel awaruza chihkanat kit au sukin Dios yal sanapa ñinnara. Usne usparuza akkwan ñinmu chihkanat kit Diosta pashianapa kamtanara, Diosta wakpuj wainñanapa.

2 An sukin Dios yalne pakwa mijazi. An ñancha putnakin uru ilampara paizkakin kunarit. Mamin maza mishari ayukta uzta. Pariyaruzne pan sun misharira Diosta taarit. Awane an ñancha putnakin sinam putnakin muntit.

3 Dios yalkin, paizkakin, pín kantítkasa nailtit. Ayukta putnakin anza sinam putnakin muntit.

4 Pín kantítkin mishari uzta, incienso impaktana. Sun mishari tikasa sara. Sun mishari urukasa pianmal appaltit. Pín kantít naptawane, mamaz katsa kaja unara. Sun katsa kaja urukasa pianmal appaltit. Sun kaja ayukta maza uru ulmune wa. “Maná” muntit panne uru ulmura wintit. Sun kaja ayukta Aarónpa chiktít tiwilkas warit. Sun kaja ayukta paas alpara uktakas wintit. Diosne diez ñinmu an paas alpara ukta para. **5** Isal kajara paas uru ángeltuza unarit. Uspane Dios iztakin kunat kit uspa itsih isal kajara appalmura

* **8:12** Jer 31.31-34

asuztu. Diosne sun kaja appalmukin awa kwail kiarit aizpa sinam kwizninnamtu. Mane nane uruza sunpa an kwinta kisachish.

6 Dios yal kapal sarawane, pariyaruzne an ñancha putnakin nappamiz kit puzamizta, pariyawa kal kianapa.

7 Katsa pariyain anza sinam putnakin maza pijin año aizpa naptu, Dios iztakin tuanpa. Anza sinam putnakin kwizta naptuasmin, katsa pariyane ainki wakarawa aimpi ayukta milta, kaja appalmukin parannapa. Usne sun aimpi ayukta milta, Dios paiña kwail kirit aizpa kwizninnapa. Sua tuasmin, katsa pariyane an aimpi milta, Dios anpa awa kwail kiarit aizpa kwizninnanapa.

8 Pariyaruz payu aizpa an sukin Dios yal uspa kal kiana nappamtuasmin, Sinam Izpulne awa Dios iztakin chiyura nappasachi aumiza kamtanamtu. An ñancha Dios yal an sukin nukkultuasmin, pariyaruz paiña kal kiarasmin, minminkas chiyura Dios tukin naptachi, Dioskasa kwinta kin.

9 Awa chiwazha piantarit aizpa an ñancha Dios yalta milarakas, sun kalparuzne awaruzpa kwail kiarit aizpa kwizninnasachi. Mane uruza kamtanash, Dios wan chiwal maizshimtu akwa, awa Dioskasa kalpain puranapa, Dios uspa kwail kiarit wat kulnanapa.

10 Dios an ñancha contrato Judío awaruza chihkanarawane, usne akkwan tuntu inimmu usparuza ininnara. Usne chiwazha kwanpa kamtanara. Usne usparuza kwazikasa kitnapa kamtanara, Dios yalta napparachasmin, us iztakin wakpuj wainñarachasmin. Judío awaruzne

wan ininmu miarawa, Jesúś au katsa pariya narakima, Dios wanta masas maiznakima.

11 Cristo au sukin atpane, usne au katsa pariya nam kit chiyura napta, aumiza wat kiwainanapa. Usne Dios iztakin napta, sua paiña wat kal au akwa kinpa. Awa Dios uzmu chiyura sarachi akwa, Diospa uzmune apas Dios yalkin anza watsal i.

12 Cristo Dios anza sinam uzmukin naptawane, usne chivowa aimpikas ternerowa aimpikas chiyura miltachi. Apas pariyaruzne pailta payukima sunkana kiara. Cristo au akwa irit akwa, usne, au katsa pariyane, Dios sinam uzmukin napta, awa kwail kiarit aizpa kwizninnanapa. Usne Dios anza sinam uzmukin maza piji napta, au kwail kiarit aizpa sinam sananapa, aumiza pailta payukima watsat milnanapa.

13 Apas pariyaruzne chivowa aimpikas torowa aimpikas impa kirittuza parannara, uspa ña pianamal mamasa sinam sanapa, mamaztuzkasa tuanpa. Ternera impaktawane, uspane ternerawa imjal kwazikasa nat kit impa kirittuza parannara, uspa ña pianamal mamasa sinam sanapa, mamaztuzkasa tuanpa.

14 Cristowa aimpine ternerowa aimpiinkas anza wari, Cristowa aimpi au ayukta kwail kiarit aizpa sinam sanantu akwa. Paiña Izpulne, Cristokasa pailta payu uztumikane, Cristora kiwainta, au akwa inapa. Cristo ussain Diosta chihkarawane, usne au akwa piantaritmika namtit. Us chinkas kwail kiritkas, usne au akwa irit, paiña aimpi au kwail minñarit aizpa

kwizninnanapa. Us au akwa irit akwa, usne au chiwazha kwail kiarit aizpa sinam sanarit, au Dios chiyura uztumikakasa tuanpa.

15 Katmizna, Cristone masas contrato awaruza chihkanarit, awaruz Dioskasa wanmakkana. Diosne awaruza akwanantu, Dios milan namtit aizpa sappanapa, pailta payukima chiyura uskasa uzanapa. Cristo Judío awaruz akwa, an ñancha contrato saptaruz akwa, irit, uspa kwail kiarit aizpa sinam sananapa, Dios usparuza chiyura pailta payukima uskasa uzninnanapa.

16 Awa irachasmin, minpazha awane pinkihta pam kit us mij aizpa mamazta milan namtu, irika. Awa sun milan namtitmika irit piankamtawane, pa kimmikane ussa milan namtit aizpa sapshina.

17 Sun pinkihta us mij aizpa pamtumika uztusmin, mamazne ussa milam namtit aizpa sapsachi, namtitmika mama uzu akwa. Namtitmika irawane, saptumikane ussa milan namtit aizpa pa kishina.

18 Dios paiña kwaltuza an ñancha contrato chihkarawane, pariyane torora piantat kit torowa aimpi parantawa, awa sun contrato sappanapa.

19 Moisés wan Dios intit aizpa wan Judío awaruza kainanarawane, usne kwanam píriku ash tit kit hisopo tira ipta. Suasne usne tenerowa aimpikas cabrawa aimpikas kwazikasa narit. Usne hisopo ti kwazikas aimpikas ulmukin pain kit Dios contratora, Dios intit aizpa pinkihta isalta tilpalta. Kwizta us wan Judío awaruza titpalnarawane,

20 usne usparuza ka kaiznara: “Diosne ukasa an contrato chihkanara, us uruza intit aizpa sap-

panapa. Sun contratora aimpi kasa tilpalta akwa, Diosne uruza contrato píñkihta parít aizpa kin namtit,”²⁰ kiznara.

21 Dios yal sarawane, sunkana Moisésne Dios yaltakas wan ayukta pura aizpakas aimpi kasa tilpalnapa ininta, chiwazha impa aizpa sinam sanapa, awa Dioskasa wanmakkana.

22 Moisésne wanpazhara aimpi kasa tilpalnapa ininta, chiwazha impa aizpa sinam sanapa, Dioskasa wanmakkana. Aimpi akwa tilpalnamtukine, Diosne mizurainkas awawa kwail kiarít aizpa kaninnasachi.

Cristone au akwa irit

23 An sukin uzasmin, Dios iztakin pianchasmin, awane chiwazha piantarawa, wan impa aizpa sinam sanapa, Dioskasa wanmakkana. Pariyaruzne Dios yalkin pura aizpa aimpi kasa sinam sanarít. Chiyura pura aizpa an sura pura aizpkinkas anza wari. Katmizna Diosne chiyura pura aizpa aimpi kasakas sinam sanarawa. Cristo au akwa irit akwa, paña aimpine ternerowa aimpi kinkas anza wari, paña aimpi aumiza sinam sanarít akwa, awa Dios iztakin aanapa.

24 Cristone, au katsa pariyane, apain Dios yalta, awa sarít yalta, naptachi. Cristone chiyura Dios iztukin napta, au akwa paikwanpa, aumiza ki-wainanapa, au Dios iztakin puranpa.

25 Apas katsa pariyane año aizpa piantit aizpa sap kit Diospa anza sinam yalta mamazpa aimpi kasa milta, awa kwail kirit aizpa sinam puranapa. Cristone maza piji it kit Dios iztakin

²⁰ **9:20** Ex 24.8

paiña aimpikasa napta, au kwail kiarit aizpa sinam kwizninnanapa.

²⁶ Dios au su sarasmin, Cristone año aizpa irachi, us maza piji pina naiztit akwa. Mane Cristone maza pijin au sukin at kit maza piji au akwa irit, au kwail kiarit aizpa kwizninnana. Usne minpa payura au akwa piantaritmika namta, awaruza sinam sanana, awa Dioskasa wanmakkana.

²⁷ Sunkana wan awaruzne maza pijin iarawa. Awa iarawane, kwiztane Diosne wan uspa kwail minñamtu aizpa chihkatchiruza ilnanazi.

²⁸ Sunkana Cristone maza piji it kit au akwa piantatmika namta, au kwail kiarit akwa naizna. Sunkana usne wan awa kwail kiarit aizpa sinam sanashina. Cristo mamaz payura mamasa kailtukas, usne sun kailtu payura awa kwail kiarit aizpa sinam sammanazi, uspa kwail kiarit aizpa me sinam sarit akwa. Sun kailtu payura usne ussa tirizturuza watsat milnanazi, chiyura uskasa uzanapa.

10

¹ Moisésne Dios Judío awaruza ininnarit aizpa parit. Uspe Dios inintit aizpa miashitchi akwa, uspane wat namarachi, Dios pashtit aizpa kiana. Chiyura pura aizpa watcha i. Kwiztane Diosne chiyura aumiza wan karamtu aizpa piankamnin-nanazi, au sukin mij aizpa pailtintu akwa. Awa año aizpa piantarit aizpa Diosta milaritkas, Moisés inintit aizpa kiarakas, uspane mizurainkas sinam sarit uzasachi. Diosne mizurainkas usparuza sappnasachi, uspa kwail kwizninnarachi akwa.

² Moisés īnintit aizpa usparuza wat namnarachikas, uspa kwail sīnam saninnarachikas, uspane chiwazha piantarit aizpa Diosta mīlamızta. Dios sun piantarit aizpa mīlturuza sīnam sanaratne, uspane mamasa sun piantarit aizpa Diosta mīltakianazi. Sīnam saritmīka paīña kwail kīrit aizpa kwiznintit pian akwa, usne ayukta paīña kwailpa mintuchi.

³ Ñamin awane sunkana minñarachi. Año aizpa kalpa piantamızta akwa, uspane uspa kwail kiarit aizpa nijkulara.

⁴ Aune tenerowa aimpikas cabrawa aimpikas kwail kimturuza mizurainkas sīnam sanasachi pianmakpas, Dios usparuza sapnanapa.

⁵ Chiwazha aimpi awawa kwail kwizninnasachi akwa, Cristo au sukin piannakane, usne Diosta ka kaizta:

“Nune chiwazha piantarit aizpa pashitchi.

Nune nawa awakana namtit, awa akwa inapa.

⁶ Awa ternero Diosta milarakas,

nune ūa impaktit aizpkas piantarit aizpkas pashitchi, awawa kwail sīnam sananapa.

⁷ Suasne Cristone Diosta ka kaizta: ‘Izti. Nane an sukin arau, nu pashimtu aizpa kin.

Nane Dios pīnkihta nawa parit aizpa kishinash.’ ”[⊗]

⁸ Ñamin Moisés sun pit pīnkihta pat kit Judío awaruza īninnara, kalpa piantanapa, uspa kwail akwa Diosta mīlaanapa. Ma payu sunkana Cristone Diosta ka kaizta: “Mane Diosne piantarit aizpa pashitchi, awawa kwail sīnam sananapa.”

[⊗] **10:7** Sal 40.6-8

9 Kwiztane Cristone Diosta ka kaizta: “Izti. Nane an sukin arau, nu pashimtu aizpa kin,” ka kizta. Us au akwa irit akwa, usne Moisés inintit aizpa painlninta, sun awaruza wat namninnamtu akwa.

10 Cristo Dios pashit aizpa kishit akwa, usne Dios inintit aizpa mīra. Jesucristone, au akwa piantatmikane, maza piji irit, au kwail kiarit aizpa sīnam sananapa, aumiza Dios iztukin uzninnanapa.

11 Wan Judío pariyaruz an sukin uspa kal ki-amtuasmin, uspane pailta payukima Diospa yalta akkwan piji sunmin piantarit aizpa mamazpa akwa milanara. Ternerowa aimpine mizurainkas awawa kwail kwizninnasachi.

12 Cristone ussain Diosta chihkarawane, au akwa piantatmika namta. Usne maza pijiin irit, au kwail kiarit aizpa sīnam sananapa. Paiña kal kapal paitawane, usne chiyura nura, Dios iztakin pailta payukima uzna.

13 Suane usne paiña Taitta Dioskasa tīriztu, paiña aliztusa kapal anuppanakima.

14 Cristone maza piji awa akwa inapa chihkara, wan Diosta piantuza sīnam sanana, usparuza watsat milnana.

15 Dios Sīnam Izpulne sun watcha pit kaiz kit Dios pinkihta ka paninta:

16 “Nane masas contrato pam kit Judío awaruza mamaz payura chihkananash. Anpatne ka kiznara.

Nane Dios inintit aizpa usparuzpa kaijchukin pi-ankamninnanash.

Nane sun pinkih parit aizpa ayukta mintukin usparuza piancamninnanash.”[◊]

[◊] **10:16** Jer 31.33

¹⁷ Suasne Dios Sínam Izpulne ma pitchin ka kaizta: “Nane uspa kwail kiarit aizpakas mama minmanash. Awa Dios inintit aizpa miamtuchikas, nane uspa kwail kiarit aizpa kwizninnat kit uspa kwail kiarit aizpa maintinash.”¹⁸

¹⁸ Dios awaruzpa kwail kiarit aizpa kihashinamtu akwa, aune chiwazha piantarit aizpa Diosta milashitchimakpas, au kwail kiarit aizpa kwizninnanapa.

Pinkihta pamtumikane kamtanara, Diosta pi-antuz ussa paikuapanapa

¹⁹ Mane, ap izmuruz, mizhain. Jesucristo au akwa irit akwa, Dios tukin naptit akwa, usne chiyura napta. Suane usne paña aimpi kasa au kwail kiarit aizpa sínam sanashina. Sun akwa aune Dios uzkin napshinamakpas, ishkwatchin, Diokasa wanmakkana.

²⁰ Jesús sun masas chiyura mi sanintit akwa, katmizna aune Dios iztukin chiyura napshimtu-makpas, Diokasa wanmakkana. Jesús irachas-min, sun chiyura mi siptit ara. Cristo uztu akwa, usne awaruza maizninnashina, masas miwara nappanapa, chiyura Diokasa uzanapa.

²¹ Au katsa pariyane, Jesúsne chiyura uz kit wan Diosta piantuza ininnamtu.

²² Katmizna Dios tura ižhain, ussa wakpuj wainna. Mane ussa wat nijkultumakpas. Dios aumiza maiznat kit au kaijchura wat namninta akwa, aune Dios watcha i pianmakpas. Cristo au kaijchukin au kwail mintit aizpa sínam sanarit

¹⁸ **10:17** Jer 31.34

akwa, aune Dios iztukin s̄inam awakana uztumakpas.

23 Diosta t̄irizna ižhain, us kin namtit aizpa kinkima. Wenamtuchin, Cristo watcha i kaizna ižhain. Paiña pit kwairachin, ussa m̄izhain. Usne us kin namtit aizpa kinazi, wenamnachin.

24 Mamaztuzpa minchain, usparuza kiwainnanapa, awaruza pashinanapa. Mamaztuza kiwainna ižhain, wat kal kianapa.

25 Diosta piantuz wanmakkakane, uspakasa wanmakna ižhain. Mazantuz ñamin wanmakkarakas, uspane wanmakna paiyari. Sun wanmakmuchiruzkana uzman. Katmizna maza mazarain kuruntawamakpas, awa Dioskasa watmin chaanapa, Diosta wakpuj wainñanapa. Mane aune awaruza kiwainnarawa, au Anpat kailtu payu piananpain akwa.

26 Maza Dios watcha pit piantamtkas, sun awa kwail kimiztune, Diosne paiña kwail kimtu aizpa s̄inam sasachi, au piantaritmikasha kwairit akwa.

27 Sun akwa, Diosne kwail kishimizturuza ishkwaninnat kit usparuza īnkin īninnanazi, usparuza ilnana.

28 Ñamin awa Moisés īnintit aizpa kitchine, kutña izwainmuruzkima us kwail kirit aizpa izarane, mikwane ussa inapa īninta. Minminkas ussa kiwainsachi.

29 Diosne Dios painkulta kwairitmikasha an tinta ilnazi, Dios painkulpa wat mintachi akwa. Cristone irit, awa masas contrato uskasa nappanapa, uspa kwail kiarit aizpa paiña aimpicasa s̄inam sananapa. Diosne Jesús chiwazha awakanain irit minturuza an

tinta ilnanazi. Sinam Izpulne awaruza Diosta wanmalninnat kit Diosta piankamwainshimtu. Sinam Izpul kiwainnamtu akwa, Diosne ussa saptuchiruza an tinta ilnanazi.

³⁰ Aune Dios kimtu aizpa pianmakpas. Ka kaizta: “Nane wan kwail kimtuza ilnanash. Nane uspa kwail kiaritkanain usparuza kailninnanash, sunkanain naizanapa.”[◊] Dioskas an kaizta: “Nane ap kwaltuza ilnanazi, nawa miamtuchine.”[◊]

³¹ Diosne, chiyura uztumikane, kwailtuza tinta ilnanazi.

³² Ñamin une Dios watcha pit miat kit Diosta piankamara. Dios uruza watsarit milanara nijkultain. Awa uruzkasa waya kiaritkas, awa uruza tinta naizninnarakas, une uspa kwail tailchaara, u Diosta nijkularit akwa.

³³ Masetne sun kwailtuzne uruza awa iztakin tinta ininnat kit uruza kwail pit kaizara. Uspane uruza akkwan piji naizninnara. U naizturuza kiwainamtasmin, sun kwailtuzne uruzakas kawarain kwail kinara.

³⁴ Une kajchira siptittuz akwa tayal kit usparuza kiwainashit kit uspa we mijat aizpa usparuza milanara. Awa u su mij aizpa walkwarakas, une tayaltachin tailchaara, uspa u kaijchukin mij aizpa walkwasachi akwa. Sun kwail tailchamtasmin, une wat tuat kit Dios uruza milamtu aizpa pianmai. Usne aumiza us mij aizpa milanana, us mij aizpa anza wat akwa.

³⁵ Katmizna, Diosta nijkulmiztain, wenamtachin. Watcha, Diosne uruza us wan kin namtit aizpa chiyura milanana.

[◊] **10:30** Dt 32.35 [◊] **10:30** Dt 32.36

36 Wan naiztu aizpa tinta tailchamtuasmin, une Dios kaizta aizpa miarawa, kwairachin. Dios pashit aizpa kiarawa, us uruza kin namtit aizpa chiyura sappanapa.

37 Diosne paiña pinkihta ka panintit:
“Imparain imparain, Cristone, amtumikane,
anazi. Usne watcha apain piannanpain.

38 Nane awaruza wat namninnanash, nakasa wanmakkanaapa.

Nawa wat nijkulat kit nakasa uzanazi.

Nane nijkultuchiruza ilnanash, nawa miarachi akwa, Diosta kwayarit akwa.”[✳]

39 Aune Diosta kwayamturuzkana chimakpas. Aune chinkas kamanash. Aune ishkwatchin Diosta kanpamtumakpas. Au Diosta nijkulamtu akwa, Diosne aumiza watsat milnanazi.

11

Diosta nijkultittuz

1 Au Diosta nijkulturuzne Dios kaiztit aizpa watcha i miptomakpas, wenamtachin. Dios aumiza kin namtit aizpa apain sapparachikas, aune Dios aumiza kin namtit aizpa pianmakpas. Diosta tiriztawane, aune sappanapas. Aumiza kin namtit aizpa izarachikas, aune an tinta namat kit Dios kaizta aizpa watcha i minñanash.

2 Ñamin uztaruz Dios kaizta aizpa watcha i nijkularit akwa, Diosne usparuzpa “wat awa mai” kiznara.

3 Au Dios kaizta aizpa watcha i nijkulamtu akwa, aune Dios au sukas au chiyukas sarit pianmakpas. Dios au su sarachasmin, chinkas wachi.

[✳] **10:38** Hab 2.3-4

Us tinta akwa, Diosne paiña pit kaiz kit wan wa aizpa sarit.

⁴ Abelne Dios kaizta aizpa watcha i nijkulta. Abel us piantarit aizpa Diosta milarawane, Diosne Abelpa wat min kit paiña milam sapta. Diosne Caín milat aizpa saptachi, Diosta nijkultachi akwa. Abel Diosta nijkulta akwa, Diosne paiña kwail sinam sat kit Dios iztakin wat sara. Abel irikas, aune mama Abelpa kamtumakpas. Aune uskana Dios kaizta aizpa watcha i nijkultawamakpas.

⁵ Enocne Dios kaizta aizpa watcha i nijkulta. Enoc uztasmin, Diosne chiyura ussa miltia. Itchasmin, usne irachi. Dios ussa chiyura miltit akwa, an sukin awane ussa wanmalarachi. Dios pinkihta Enocpa parit: “Us Dios intint aizpa mirit akwa, Diosne Enocpa wat min kit kwizta chiyura miltia.”[◊]

⁶ Dios kaizta aizpa watcha i nijkultuchimikane Dios pashit aizpa kisachi. Diosta wakpuj wainshimtumikane Dios watcha uzi nijkultawa. Diosne ussa saimtuza us kin namtit aizpa milananaazi.

⁷ Noéne Dios kaizta aizpa watcha i nijkulta. Dios Noéra “mamaz payura nane an su pi pinninnash” kuruntawane, Noéne chinkas iztachin Dios kaizta aizpa watcha i nijkul kit ishkwat kit kwisha katsa kanua samizta, paiña kwaltuza watsat milnana. Noé Dios kaizta aizpa watcha i nijkultit akwa, Diosne Noéra watsat milnat kit Dios kaizta aizpa nijkultuchiruza ilnara. Noé Dios kaizta aizpa watcha i nijkultit akwa, Diosne Noéra wat namnin kit ussa watsat milta.

[◊] **11:5** Gn 5.21-24

8 Abrahamne Dios kaizta aizpa watcha i njikulta. Diosne Abrahamta akwat kit mamaz su milan namta. Us minta imtu pianchikas, Abrahamne Dios inintit aizpa mit kit paiña sukis puzta, Dios sun su milan namtit aizpa sapnapa.

9 Abraham Diosta njikultasmin, sun suwara Dios milan namtit sukin puztuasmin, Abrahamne iranchuruz sat kit mamaz suras awakana uzta. Abraham paiña paspara, Isaacta, kawirawane, Isaacne sun Dios milam namtit sukin uz kit iranchuruz sat kit Abraham uztakana uzta. Isaac paiña paspara, Jacobta, kawirawane, Jacobne sun suwara Dios milan namtit sukin uz kit iranchuruz sat kit Isaac uztakana uzta. Diosne sun kutñaruza sun su milan namnara.

10 Abraham an sukin milan namtit aizpa sapshimtuasmin, usne Diosta tñrizta, mamaz pipulura, chiyura, inpa, Dioskasa minpa payukima uznapa. Diosne an pipulura sarit.

11 Sarane Dios kaiztit aizpa watcha i njikulta. Sara kwisha inkwa parit akwa, usne pashpia mísachi. Usne Dios kin namtit aizpa watcha i njikulta, wenamtachin, pashpia wanapa. Pashpia warawane, Sarane piya ishta. Suas pashpia taizta. Sara inkwa parítkas, Abraham ilapa parítkas, uspane Dios kaizta aizpa watcha i njikulpail kit pashpia kawirailta.

12 Abrahamkas kwisha ilapa parítkas, usne pashpia kawirat kit papihsh namta. Paiña pashpene akkwan pashpia kawirara, aiznakima. Maza ampukis wan Abrahampa pashpaz kawiara. Kimaruz wiansachi. Pi ksukas wiansachi. Sunkana Abrahampa kwal wiansachi, aiztit akwa.

13 Iarachasmin, suntuzne Dios usparuza milan namtit aizpa sapparachi, Dios kaizta aizpa watcha i njikularitkas. An sunkin Dios usparuza milan namtit aizpa sapparachikas, uspane Dios kaizta aizpa watcha i njikulat kit chiyura wan sappanazi pianmai. An sukin uztuasmin, uspane “pailta payukima an sukin uzanawas” minñarachi.

14 “Apas chi makpas” kizturuzne mamaz sura sayantu. Uspane wantuza “chiyu sura sayantu” kainanantu.

15 Uspane uspa ñamin su uzarakin kaiyashitchi, uspa kailna minñarachi akwa.

16 Uspane anza wat su, chiyura su, pashiara. Katmizna Diosne uspa akwa mamaz su sara, Dios uztukin puranpa. Dios uspa akwa mitsalchi akwa, Diosne “nane uspa Dios ish” kiztu.

17-18 Ñamin Diosne Abrahamta ka kin namtit: “Up painkul, Isaac kawirawane, usne akkwan pashpia milnazi, akkwan kwal aiznakima. Abrahamta kwal munanazi,”[✳] ka kizta. Dios Abraham minta aizpa piankamtit akwa, usne Abrahamta ininta, paña painkulta, Isaacta, piantanapa. Abraham Dios kaizta aizpa watcha i njikultane, usne Dios inintit aizpa kishina. Us piantarit aizpa Diosta milashimtu akwa, Abrahamne Dios inintit aizpa mit kit maza painkul mijatmikasha, Isaacta piantashina. Sun akwa Abrahamne Dios kin namtit aizpa watcha i njikulta.

19 Abrahamne Diosta njikul kit ka minta: “Diosne Isaacta irittas mamasa kakulninshina.”

[✳] **11:17-18** Gn 21.12

Isaac irachikas, Abrahamne ussa mamasa sapta, kamkis kakultitmikakana.

²⁰ Isaacne Dios kaizta aizpa watcha i nijkulta. Isaacne Diosta paikwara, Jacobkas Esaúkas Dios kin namtit aizpa mamaz payura sappanapa, Dios usparuza wat kiwainanapa.

²¹ Jacobne Dios kaizta aizpa watcha i nijkulta. Jacobne inapain azi. Tiwil putnaintuasmin, Dios iztakin sumtittuasmin, Jacobne Diosta paikwara, paas Joséwa painkultuza wat kiwainnanapa.◊

²² Joséne Dios kaizta aizpa watcha i nijkulta. Irachasmin, Joséne Israel awaruz Egípto suras puzanazi kiznat kit imtu payura paiña sih uspakasa milnapa ininnara, Canaán sura kamanapa.

²³ Moiséspa papihshkas akkuhshkas Dios kaiztit aizpa watcha i nijkulpailta. Moisés ainki tuasmin, papihshkas akkuhshkas kutña mishkima uspa watsal iztit pashpara puntit mijara. Katsa mikwa wan ampu pashparuza piantanapa inintit akwa, uspane katsa mikwa inintit aizpa ishk-wailtachi, mishichiwail. Katmizna uspane (papihshkas akkuhshkas) Moisésta piantarachi.

²⁴ Moisésne Dios kaizta aizpa watcha i nijkulta. Moisés ilapa parawane, usne nat kit “Faraónpa, katsa mikwawa pashune ap akkuhsh chi” kizta. “Nane paiña painkul chish,” ka kizta.

²⁵ Moisésne Israel awakasa uzna narit. Katsa mikwa sukin naiztukas, usne katsa mikwa kwalltz kwail kiarítkana kishitchi.

²⁶ Us Israel awakasa wanmaktit akwa, Moisésne Cristo naiztitkana naizta, Egípto sura uztuz ussa

◊ **11:21** Gn 47.31–48.20

kwayarit akwa. Egipto su mikwa pa kiaritkas, Moisés paiña papihsh kiznakana pa kishitchi. Usne Egipto su uzturuzkana uzshitchi, uspa kwail kiarit akwa. Moisésne Dios mīlamtu aizpa an wariminta. Egipowa pialne wat chi minta. Moisésne Diosta tiritza, Dios ussa mamaz payura milan namtit aizpa sapnakima.

²⁷ Moisésne Dios kaiztit aizpa watcha i nijkulta. Usne Egipto sukis puz kit aliz kultit katsa mikwara ishkwatchi. Diosta iztachikas, Diosta kwairachi. Moisésne us kuruntit aizpa kanpara, Dios uskasa kwinta kit akwa.

²⁸ Moisésne Dios kaiztit aizpa watcha i nijkulta. Usne wan Israel awaruza pírikuruza piantanapa ininnara, Pascua pishta izanapa. Suasne pírikuwa aimpi pirulta wintawane, uspane pijta isalkinkas pijta kanmalkinkas niara, ángel uspa an ñancha painkultuza ininnamanpa.

²⁹ Judío awaruzne Dios kaizta aizpa watcha i nijkulara. Katmizna uspane mittiwara Kwanam Pira pilpara kwakkara. Egipto awa sun pimin kwakkashimtuasmin, uspane kwaara.

³⁰ Judío awaruzne Dios kaizta aizpa watcha i nijkulara. Uspene Jericó pipulura siete payukima pílsamtaara. Kapal pílsaarawane, Diosne Jericó pipuluwa kalpialtuza azpian kit nainninnara, Israel awa Diosta nijkulara akwa.

³¹ Jericó kalpial naintachasmin, suane, maza ashampane, Rahab muntitmkane, Jericó pipulura uzta. Kwail ashampa akwa, usne ñamin akkwan ampukasa chaarit. Rahab Dios kaizta aizpa watcha i nijkultit akwa, usne Jericó awakasa irachi. Ñamin paas Judío awaruzne Jericó

pi pulura puintain aulta, sun pi pulura iznapa. Ailtawane, Rahabne uspa paasta wat sapnat kit paña yal nammilat kit paña yalkin kulnaninta. Uspa paasta kiwaintit akwa, usne Jericó awa njkultachiruzkasa irachi.

³² ¿Uruza mamaz kwinta kinsa? Mamaztuzpa kwinta kisachish. Mama we ish. Nane uruza Gedeónpakas, Baracpkas, Sansónpakas, Jeftéwakas, Davidpkas, Samuelpakas, Dios kainammtuzpkas kwinta kisachish.

³³ Uspane Dios kaizta aizpa watcha i njkulara. Mazantuzne waya kit kit katsa mikwaruza anuppanara. Mazantuzne awaruza ñinnara, nil uzninnanapa. Katmizna uspa Diosta paikuara akwa, usne usparuza kiwainnara, Dios milan namtit aizpa sappanapa. Mazantuz ishuruzkasa siiparitkas, Diosne usparuza katsa ishukis puzninnara, ishu kumanpa.

³⁴ Awa mazantuza katsa ñkin kiaintitkas, uspane impaktarachi. Mazantuzne imasarit, awa usparuza mashtikasa piantashiamtasmin. Najittuzne tinta kularit. Mazantuzne tinta waya kiat kit aliztuza anuppanara. Diosne anparuzakas kiwainnara, Diosta njlularit akwa.

³⁵ Ashampawa pashparuz iaritkas, Diosne sun pashparuza kuhsninnara, mamasa uzanapa.

Awa mamaztuza naizninnarawane, uspane iara, Diosta kwairashitchi akwa. Uspe apa iarane, uspane chiyura uzanawas pianmai. Diosne anpparuzakas kiwainnara, uspa Diosta njkularit akwa.

³⁶ Awane mamaztuza ishanat kit ilnara. Awane usparuza cadenakasa kaanarit kit kajchira

sipnarit.

³⁷ Mamaztuzne iarit, usparuza uk kinarit akwa. Awane mamazuza ti kizmukasa kakwakin titnara, ianapa. Mamaztuzne píriku ayakasa cabra ayakasa kwaarit, kamisha mijchi akwa. Mazantuzne inkalparain chaara, uspa yal mijchi akwa. Mamaztuzne puiza namarit. Awane mamazuza aim kinarit, naizanakima.

³⁸ Sun naiztaruzne an wat awa mazi. Mamazuza naiznintaruzne kwail awa mazi, naizturuza uspa sukis kwainarit akwa. Uspane inkalparakas, awa purachiwarakas, awa mi karittuzkanain chaara. Sun naizarimturuzne an wat sura uzanazi. An sukin uzaraasmin, uspane uk kultakas pil kultakas uzara.

³⁹ Diosne wan naiztaruzpa wat minñara, Dios kaizta aizpa watcha i njukularit akwa. Minminkas an sukin Dios usparuza milan namtit aizpa mama sapparachi,

⁴⁰ Dios au akwa chiwazha an wat kinashimtu akwa. Diosne paiña kal kapal pailshira, ñamin uzaritkas ma payu uzturuzkas Dios milan namtit aizpa parejuin sappanapa, wan Diosta njikulturuz Dioskasa uzanapa.

12

Pinkih pamtumikane ka parit: Cristora kan-parawamakpas

¹ Nane akkwan awa Dios kaizta aizpa watcha i njukultaruzpa kwinta kinarau. Uspane chiyuras izwainmuruzkana mai. Aukas uspa uzaritkana uzna piankamtawamakpas, wan naiztu aizpa tailchanapa. Katmizna

chiwazha aumiza kiwainamtuchi aizpa mamin chihkatpamakpas. Chiwazha kwail kishimtu aizpa chihkatpamakpas. Aune Cristora kanpat kit minpa payukima wan chiwal impara imparain tailchatpamakpas. Aune Dios pashit aizpakash, Dios inintit aizpakash, kitpamakpas, wenamtachin.

² Aune Jesústain kanparawamakpas, us pashit aizpa kiana. Usne Dios kaizta aizpa watcha i aumiza níjkulninnara, Dios aumiza chiyura watsat milnanapa. Jesús an sukin uztuasmin, usne naiz kit ishtu tailchat kit kurishta irít. Jesús kurishta irítkas, usne mitsal kitchi, Dios ussa chiyura watsal kinninta akwa. Katmizna mane usne Dios mamin uz kit Dioskasa wantuza ininnantu.

³ Jesúsnne aukinkas an tinta naizta, awa ussa aliz kulaat kit kwail pit ussa paraara akwa. Katmizna wan naizamtu aizpa tailcharain. Najtit awakana uzman.

⁴ Uspa Cristora piantaritkas, makima kwail-tuzne uruza piantanarachi. Ukwail kiashitchikas, uspane uruza kwail kianapa ininñara, u Cristora níjkularit akwa.

⁵ Une Dios uruza, paíña pashparuzakana kurun-narit aizpa mainman, Dios pitta ka parit akwa:

“Ap painkul, mizha. Na uruza ilnamtukas, nane uruza kamtanamtu, na kaiztu aizpa miánapa.

Na chiwazha kiman kaiznarakas, nane uruza kurunnamtu, u kaijchukin tinta namanapa.

⁶ Nane, u Anpatne, up pashimturuza kurunnam-tus, kwail kiamanpa.

Wan Diospa pashparuz kwail kiakane, nane uruza tit ilnanash, u kwail chihkanapa,

uruza mamasa sappana.”[⊗]

7 Une Dios uruza ilnamtu aizpa tailcharain, Dios sunkana uruza paiña pashparuzkanain kurunnamtu akwa. Wan papihshtuzne pashparuza ilnamtu, kwail chihkaanapa.

8 Diosne wan paiña pashparuza ilnamtu, us kaiztu aizpa mianapa. Dios uruza kurunnamtukine, uruza ilnamtukine, une Diospa kwal chi mai. Dios uruza ilnamtukine, une sailta pashparuzkana mai.

9 Mane ma pitchin uruza kainanash. An sukin uzamtuasmin, au papihshtuzkas au akkuhshtuzkas aumiza ilnara, au wat nijkul kit chanapa. Katmizna aune usparuza chikas kikaimakpas. Usawa wat mintamakpas. Katmizna Dios aumiza ilnakane, aune Diosta an chikas kikaimakpas, us au chiyura papihsh namtit akwa. Usne aumiza uskasa pailta payukima uzninnanazi.

10 Au papihshtuzkas au akkuhshtuzkas aumiza an sukin akkwan payuchin ilninnara, aumiza kamtanashit akwa. Diosne aumiza ilnamtu, aumiza wat namninnanapa. Usne aumiza sinam saninamtu, au kwail chihkanapa, Dios kaizta aizpa mianapa.

11 Dios aumiza ilnakane, aune naiztumakpas, us aumiza ishnintu akwa. Kwiztane kapal Dios kamtarit aizpa piankamarawane, awane nilmin kiat kit Dios iztukin kalpain uziznapas.

Pinkih pamtumika ka parit: Aune Dios paramtu aizpa mirawamakpas

[⊗] **12:6** Pr 3.11-12

12 Katmizna Cristora nijkulamtuasmin, uruz-pain an tinta namnintain. Najturuzne an tinta kultain, Cristora kanpaanapa.

13 Cristora kanpaamtuasmin, une wat aizpa kiranin. Cristora we nijturuza wat kurunnarawa, kailsa miwara chaamanpa. Suasne uspane Cristo mi kaamanazi. Sun akwa Diosne uspa kwail kiarit aizpa kaninnanazi.

14 Aune Diosta piantuzkasa kalpain uzshiarawamakpas. Wan kwail kiashit aizpa chihkarain. Diosne uspa kwail chihkamturuza sinam saninanaat kit Taitta Diokasa uzninnanazi.

15 Uruzpain iztain, wan awa Dios kiwainshimtu aizpa sappanapa, Diosta chihkamanpa. Diosta kwayamturuzne, Cristora an kanpashim-tuchiruzne, Dios kaizta aizpa mishimturuzka kwail kininnashina. Une mamaztua kwail kiman, Dios mi kwaimanpa.

16 Esaúne kwail awakana uzta. Mamazpa ashampakasakas mamazpa ampukasakas uskana pitman. Uskanain Dios aumiza kurunantu aizpa kwaiman. Esaú Dios kuruntit aizpa mishitchi akwa, usne paña papihsh ussa milan namtit aizpa karit. Esaúne Isaacpa an ñancha painkul ara. Maza payura kwisha yak kirit akwa, Esaúne aimpihshta wan sukas, wan ussa milan namtit aizpakas paininta.

17 Une Esaú kwizta kirit aizpa pianmai. Papihsh ussa wan milan namtit aizpa saptachikas, usne papihshta paikwat kit tinta azta, us painintit aizpa mamasa sapnapa. Esaú Diosta miashitchi akwa, Diosne ussa kwairit. Esaú us kit aizpa maizsachi

akwa, usne ussa milan namtit aizpa mizurainkas saptachi.

18 Ap izmuruz, na kaiztu aizpa mizhain. Diosne aukasa masas contrato chihkanara, awa Dios tukin piannanapa. An ñancha contrato sunkana chi azi. Ñamin Judío awaruzne Sinaí muntit īnkalta iat kit an ñancha contrato sappara. Uspane sun īnkalta saarachi, īn puztit akwa. īnkalpara til wanish sīp kit tilkwil parit. Tinta inkwa parit.

19 Mazantuz iru kwil tinta usamtuasmin, Diosne usparuza, Judío awaruza, tinta paranara. Ishkuarit akwa, uspane Diosta tinta aakwara, usparuza mamaz pit kaiznamanpa.

20 Uspane Dios īninnarit aizpa sappashitchi. Sunkana usparuza ka īninnara: “Chiwazha awakas chiwazha kalpakas an īnkalta mitti kultane, une ukkasa kiarawa, inapa. Tiznamkasakas piantarawa,”²⁰ ka kiznara.

21 Moisés sun kirīt aizpa iztawane, usne ka kaizta: “Nakas ishkwat kit ultus,”²¹ ka kizta.

22 Judío awa an ñancha contrato sapparakas, Diosne masas contrato ma payu uruza chihkanamtú, Diosta piantuz Sión īnkalta, Dios uzmura, chiyura Jerusalén pipulura, piannanapa. Suane minminkas yawa mil ángel chiyura uzamtu wiānsachi. Uspane Dios iztukin kwisha wat pura.

23 Diosne usparuza, Cristora an ñancha piantuza, wiānta. Iarawane, Diosne uruza chiyura wanmakninnanazi. Suane Diosne, au katsa mikwa Juezne, uz. Suane usne wat namtittuza wanmakninnamtu. Diosne uspa kwail kiarit aizpa sinam saninnamtu, chiyura miñnana.

²⁰ **12:20** Éx 19.12-13 ²¹ **12:21** Dt 9.19

24 Jesúsn̄e masas contrato ukasa saninta, uruza chiyura nuninnanapa. Us au akwa irit akwa, usne au kwail kiarit aizpa paiña aimpikasa sinam saninnara. Sunkana Jesúsn̄e ukasa sun masas contrato sarit. Caín paiña aimpikhsta, Abelta, piantarawane, Diosne Caínta ilta. Awa Jesústa piantarakas, Diosne, Jesúspa aimpikasa, awaruza sinam sanashit kit uspa kwail wat kulnashina.

25 Katmizna Dios aumiza kurunnamtuasmin, aune us kainammtu aizpa mirawamakpas, kwairachin. Ñamin au sukin Dios sun Judío awaruza paranamtuasmin, uspane Dios ininnarit aizpa miashitchi. Dios usparuza kurunarit aizpa miarachi akwa, Diosne usparuza ilnara. Mane Diosne chiyuras aumiza akwanamtu, us kurunamtu aizpa mianapa. Usne us kuruntu aizpa kwaimturuza watcha ilnanazi.

26 Ñamin Dios usparuza tinta paranamtuasmin, usne wan sura ulnhinta. Makas usne kin nam kit ka kaitza: “Nane mamasa kwinta kinash. An surakas chiyurakas ulninnash,”²⁸ ka kizta.

27 Dios mamasa wan sarit aizpa ulninnanash kitzane, Diosne aumiza wan sarit aizpa pailnapain kamtanananamu. Dios chiyura mij aizpa ulmanazi, pailta payukima mamtu akwa.

28 Dios inintukin ultuchi, mizurainkas maiztuchi akwa. Suane Diosne aumiza kin namtit aizpa milanaz, uskasa uzanapa. Dios au akwa wat kimtu akwa, Diosta aishtaish kaizchain. Dios iztakin piannakane, Diosta wakpuj waintuasmin, aune Diosta ishkuatpamakpas. Us kuruntu aizpa mizhain.

²⁸ **12:26** Hag 2.6

29 Dios ussa m̄imtuza kiwainashimtukas, Diosne katsa īnkanajin nam kit kwail kimtuza ishkwaninnanazi. īn wan impakkamtukanain, Diosne kwailtuza pailninnanazi.

13

Pinkih pammikane ka parit: Dios pashit aizpa kitpamakpas

1 Cristora piantuza pashinarain, aimpihstuzkanain kwampihshtuzkanain.

2 Attishtas Diosta piantuz up yalta aakane, yal nammilatpa. Mazantuz mazantuza yal nammilanakane, uspane ángeltuza yal nammilanara pianchin.

3 Kajchira siptittuza minñat kit kiwaintain. Une aim kirittuza kiwainnarain, u uspakanain an sukin naizashimtu akwa.

4 Kasara kirittuzne nil uzarawa. Mamazpakasa chakain. Sinam awaruzkana uztain. Kasara kitchasmin, mamazkasa pitkain. Kasara kitpane, mamazpakasa pitkain. Diosne sunkana kimtuza ilnanazi.

5 An sukin uzamtuasmin, pialmin pashiman. U mij aizpkasa wat uztain. Diosne ka kaizta:

“Nane uruza mizurainkas kwainamtuchish.

Nane u we mij aizpa milanazi.”⁵

6 Katmizna aune wan awaruza ka kizshinamakpas:

“Ap Anpatne ap kiwainnumika i.

Nane awa nawa kishimtu aizpa ishkumanash.”⁶

⁵ **13:5** Dt 31.6, 8 ⁶ **13:6** Sal 118.6-7

7 Dios pit uruza ñamin kamtamtruza mintain. Iarachasmin, an sukin uzamtuasmin, uspane Dios kaizta aizpa watcha i níjkulara, wenamtachin. Katmizna uspa uzarakanain uzat kit Diosta níjkultain.

8 Jesucristo mizurainkas maiztuchi akwa, aune us kaiztu aizpa níjkulshinamakpas. An ñamin awa puraruz uzarasmin, Jesucristone maiztachi. Makas maiztuchi. Mamaz payura maizmanazi.

9 Awa uruza mamaz tuntu kamtam kamtanamtune, na kamtamtitkana kamtamtukine, usparuza míman, usparuza kanpaman. Dios aumiza pashinantu akwa, usne aumiza wat kiwainashimtu, au kaijchu an tinta kulanapa, Diosta an wat mianapa. Judío awaruzne uspa kuamtu aizpa nanamtu, impa kuamanpa. Uspe impa aizpa kuamtukine, uspane uspa kaijchu an tinta kulanazi minñara. Sunkana chi. Judío awa impa aizpa kuamtuchikas, Diosne uspa kwail kiarít aizpa sínam sanasachi.

10 Jesucristone au akwa irit, au kwail kiarít aizpa sínam sananapa. Judío katsa pariyaruzne wakarara piantat kit Diospa katsa yalta milanarakas, uspane aukanain Diosta wanmakkarachi, Diosta wari kizanapa.

11 Katsa pariyane wakarawa aimpira sap kit Diospa yalta nap kit Dios iztakin sun aimpi paranta, Dios awa kwail kiarít aizpa sínam sananapa. Suasne usne wakara ña kalpialmal inak kit pianamal impaktara.

12 Sunkana Jesúsne pipulu pianamal au akwa naiz kit mitsal kit kit irit. Paiña aimpi puztit

akwa, usne paiña kwal kwail kiarit aizpa sinam sananara.

¹³ Awa Jesústa kwayarit akwa, Jesúsné pipulu pianamal irít. Awa Jesúsn naiztakanain aumíza naizninnamtukas, Jesúsn kamtarit aizpa kimirachain. Aune au ñancha mirít aizpa chihkatpamakpas, Jesústain kanpanapa.

¹⁴ Aune an sukin pailta payukima uzamapas. Katmizna aune mamaz chiyu uzmura saimtumakpas, mamaz payura sua uzanapa.

¹⁵ Aune Diosta “Dios kwisha wari” pailta payukima kizmirachain, Jesucristo au kwail kiarit aizpa sinam sanarit akwa. Diosta aishtaish kiztuasmin, aune “usne au Anpat i” kiztumakpas.

¹⁶ Aune wantuza wat kinarawamakpas. Aune chiwazha mijchiruza milatpamakpas. Mamazuza kiwainamturuzne Dios pashit aizpa kiamtu.

¹⁷ Uruza Dios pit kamtamtuza mīrain, uspa kurunamu aizpa kianapa. Dios pit kamtamturuzne uruza wat iznamtu. Uspa kal paitawane, sun Dios pit kamtamtuza uspa kal akwa Diosta kainarawa. Une sun Dios pit kamtamtuza kiwainnarawa, uspa kal watsal kianapa, tayalamana. U uspa kuruntu aizpa miāmtukine, uspane uruza kiwainnasachi.

¹⁸ Au akwa Diosta paikwarain. Na an sukin uztuasmin, nane u iztukin wat aizpa kirau. Ukasa chamtuasmin, nane wat pura aizpa kirau mintus.

¹⁹ Nane uruza akwanamtus, u Diosta paikwanpa, na u uztukin an azain kailnapa.

Pinkih pamtumika minpa pit pamtu

²⁰ Mane nane Diosta u akwa paikwanash, Dios uruza chiyura watsat miñninanapa, kalpain

uzanapa. Diosne au Anpat Jesucristora, au katsa píriku izmumikasha, irittas kakulninta. Jesúsne paña aimpi kasa masas contrato chihkara, aumiza chiyura napninnanakima. Aune chiyura pailta payukima uskasa uzanapas, Dios aumiza milan namtit aizpa kinpa.

²¹ Nane Diosta paikumtus, us uruza wan kal wat kiwainnapa, us pashit aizpa wan kianpa. Jesucristone uruza tinta kiwainnanazi, Dios pashit aizpa kianpa. Aune pailta payukima “Cristo kwisha wari” kizmirachain. Ka azi.

²² Ap izmuruz, wat mizhain. U Diosta pianka-marit akwa, nane na kuruntu aizpa mianapa paikumtus. Nane uruza akkwan pitchin kamtanat kit pinkihta panarau, wan piankamanapa.

²³ An pinkih uruza ininnamtua smin, nane au aimpi hsh Timoteo kajchiras puzta kainanamtus. Us nakin azain piannakane, nane uskasa uruza iznana irinash.

²⁴ Wan Dios pit kamtamtu zakas wan Diosta piantu zakas kakishapu kitztain. Italia sura uztuzne uruza kakishapu kaizamtu.

²⁵ Nane Diosta paikumtus, us uruza wat kiwainnanapa.

Pailti.

Masas Pit Jesucristowa New Testament in Awa-Cuaiquer

copyright © 2002 Wycliffe Bible Translators, Inc.

Language: Awa-Cuaiquer

Translation by: Wycliffe Bible Translators, Inc.

Copyright Information

© 2002, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Awa-Cuaiquer

© 2002, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

lvi

PDF generated using Haiola and XeLaTeX on 18 Apr 2025 from source files
dated 29 Jan 2022
541a20ee-1de1-55f8-8b77-cbcd160a1567